

**Poolu kadasi ciciri su bo i kere
fa maari
TESALONIKAFOM
ni**

¹ Mini Poolu, ni Silivanusi, ni Timoti sukere ahin kadasi n ma ambere Kristo jama n bo am wo Tesalonika mie kpiri n nu na am ti ya Si Nyeme ni ya Mibie Yesu Kristo dee minem ni. Nyeme buka am, na i ma am ahoreda.

Kabo Tesalonikafom woowa ni bu yarada tiiri barasu ni

² Sanga kere ya da Nyeme asi ambere kere dee ti wo, na ya susere Nyeme ma am, ³ na ya sutenge am su ya Si Nyeme do, kabo am fa am yarada fa yo juma barasu ni, ni kabo am la koro, na am fa yo juma barasu ni, ni kabo am bita am tama n kenken fa ko ya Mibie Yesu Kristo do ni. ⁴ Ya ninbaam, Nyeme koro am, na ya si ka wo yi am ka am yo i tienngu dee minem, ya si ka i ti so o, ⁵ dama sangha bo ya kaanri labari kpa n kereeri am ni, wo ti ma noanie jooowa ngumi wo, ama, i fite Awiewie Casi n dee yiko n nu wo, ye am siiri tenle su ka i ti nahore a. Sangha bo ya woori am do ni, am nuuri kabo ya wo tiiri barasu, i fiteeri ka ambere dee ti ye ya woori so a, adena i buka am. ⁶ Na am ason ya ni Mibie n dee wo n su, haari ni bo am diiri wahara agaya n kere ni, am deerri labari kpa n wo, ni ahorejo n bo i fite Awiewie Casi n do ni. ⁷ Am nyini wo n ti, yaradayofom kere bo bu wo Makedoniya ni

Akaya awɔrem n nu anu ka i ti ye ni ka bu son am su. ⁸ Má ka Makedoniya ni Akayafom tiiri Mibiε n labari n fiteeri am do n ngumi, ama, yarada n bo am yoori Nyeme ni, i jore abara aye deke kere. Nyini ti, ya la má jore be bo ya kan kun. ⁹ Nyini minem n kere kan kabo am deeri ya barasu, sanja bo ya baari am do ni, ni kabo am kaakiiri am sin boori amɔem na am su Nyeme bo i ti nahorefɔ na i wo bere sanja kere ni, ¹⁰ na am nminda i Wa Yesu, yiri fite Nyeme do angoro ba a, yiri ye Nyeme atenge i yiwee n nu n a, yiri yí ya fite jina cɛen deε kekereke n nu a.

2

Kabo Pɔɔlu yoori i juma Tesalonika miε kpiri n nu barasu ni

¹ Ya ninbaam, ambere mmɔɔ ni am tii si ka, ba n bo ya baari am do ni, wo ka má ngbɛen. ² Am si kabo bu boori ya, na bu wuraari ya nyinse Filipiya miε kpiri n nu ka, ye ya nya baari am do Tesalonika a. Ama, na Nyeme ama ya ahoresi na ya koro akan i labari kpa n akere am, haari ni bo mine dongu asoro má ya su mmɔɔ ni. ³ Nɔaniε n bo ya kan kereeri am ni, i ti má ka ya mini atin wo, wara i ti má ka ya la sunsunni tie be wo, i sa su ti má ka ya koro ka ya dadaka be wo. ⁴ Ama, sanja kere ya jɔjɔori kabo Nyeme koro n wo, dama yiri jina ya sin a, ye wo fa labari kpa n ama ya ka ya kan i. Ya yo má ka i sun adamande nu wo, ya yo ka i sun Nyeme nu a, dama yiri fiiti si deke bo i wo ya ahore su a. ⁵ Am si tenle su ka ya ba abo má am anɔɔfie wo, na

ya ba akan má labari kpa n ka ya nyunu aboro neŋge kpini su wɔ. Nyemɛ wo ya daani, ⁶ ya yo akoro má kansɪ am dɔ, wara be dɔ. ⁷ Má kabo ya ti Kristo jaramasam ni, má ya koro se am ka am yo deke kerɛ ma ya. Ama, sanɔa bo ya woori am dɔ ni, ya woori benle wɔ, kabo bara baawufɔ niɛ i nbaam dika n wɔ. ⁸ Koro bo ya fa koro am n dɛɛ ti, ye ya kaanri Nyemɛ labari kpa n maari am a, na ya gusu akun ya ŋu ama am, dama ya koroori am agaya n dɛɛ ti. ⁹ Nahɔre, ya ninbaam, am tenɔe su kabo ya boroori ya nyi yoori juma nahɔre su, ya yoori juma wiesu, ni kɔŋɔue, adena má ya fa ya fie fie be, sanɔa bo ya kaanri Nyemɛ labari kpa n maari am ni.

¹⁰ Amberɛ yaradayofom ni, am ni Nyemɛ mmɔɔ kerɛ wo ya daani, kabo ya wo tiiri, sanɔa bo ya woori am dɔ ni. Ya woori am dɔ ni akunnu fofoe wɔ, na ya sa kerɛ ako atin n su, ya yo má sa be bo i fa jarakɪ ba. ¹¹ Am si ka sanɔa bo ya woori ni amberɛ ni, ya bitaari am kabo sonɔ bita i nbaam n wɔ. ¹² Ya maari am ahoresi, na ya dada am ahore, na ya ye am nyi ka am wo kabo i ti ye ni ka Nyemɛ minem wo barasu n a. Yiri fereeri am a, ka, am ba yo i dɛɛ minem bo i niɛ am dika, na am bá nya i dɛɛ jirima ni.

¹³ Na ya gusu da Nyemɛ asi sanɔa kerɛ, dama sanɔa bo am deeri Nyemɛ nɔaniɛ n bo ya kan kereeri am ni, am ade má i ka i fite adamande dɔ ɔ, ama, am ade i ka i ti Nyemɛ nɔaniɛ wɔ, na i ti sɔ ɔ nahɔre su, ye i wo amberɛ yaradayofom ahore su yo juma a. ¹⁴ Ya ninbaam, sam bo bu yo tuuri Kristo jamam bo bu wo Yudiya asien n su ni, nyini sam ye ba tu amberɛ gusu n a. Kabo

am tienngu minem akere am wahara barasu ni, so ye Yudafom yo fa kereeri Kristo jamam n a. ¹⁵ Bere kuunri Nyeme noanie kanfom ye bu kaaki kuunri ya Mibie Yesu, na ba kere ya wuwuruwa, na ba yo sa bo i sun ma Nyeme nu, na ba yo adamande kere kpofom. ¹⁶ Na ba koro ka bu kanda ya ka ma ya kan Nyeme noanie n kere minem bo bu ti ma Yudafom ni, adena ma bu nya tiide. Na nyini satie n aba abuka bu satie n kere su ako asin su. Ama, kisa, Nyeme afa yaa bu nu, i sudi bu jore.

Kabo ma Pɔɔlu koroori ka i ko nie Tesalonikafom busu ni

¹⁷ Ya ninbaam, sanja bo ya kpaaki yakiiri am kaan so ni, ya sunsunni yiri woori am do o, na ya wara ado am agaya, na ya boro ya nyi ka ya ba nie am busu. ¹⁸ Ma ya koroori ka ya kpie ya nyi ba am do. Haari na mini Pɔɔlu ni m tii akoro ka m kpie m nyi ba am do, kpe nyenyɛ kere, ama, Sitana akanda ya. ¹⁹ Ya koro ka ya kpie ya nyi ba am do, dama sanja bo ya Mibie Yesu ba kpie i nyi ba ni, ya la ahoresi ambere dee ti, na ya la ahorejo, na ya kaaki koro fo ka ya nya teremasu i do. ²⁰ Nahore, ambere ti, ye ya la ahorejo koro bo ya hoe n a.

3

¹ Kabo ya ni ambere akpaaki ace n dee ti, ya wara ado am agaya, nyini ti, ya na yere ka Atensi mie kpiri n nu. ² Na ya sunma ya niwa Timoti ka i ba nie am busu. Ya ni yiri sanja yo juma fa ko Kristo labari kpa n kan su, ye ya sunmaari i ka i ma am nya ahoresi, na i ma am jina kenken

fa kɔ am yarada n su. ³ Adena má am be ηunie yɔrɔki i fa kɔ ahin wuwuruwam bo bu sukere am n ti. Ambere mmɔɔ ni am tii si ka, nyini sam bo bu tú yere yaradayofom ni, Nyeme koroowa lee. ⁴ Dama sanɔa bo ya toko wo am do ni, ya yo seeri am ka bu bá kere ya wuwuruwa. Kabo am si ni, nyini lee ye wo tu ya n a. ⁵ Nyini ti, ma koro amindi má, ye m sunmaari Timoti na i ba nie ka am toko bita am yarada n kenken n a. Beni, kisa Sitana akoro anya atin adadaka am, wo ma ya juma n bo ya yo i am do n kere aka ηgbɛɛn.

⁶ Ye kisa, Timoti akpie i nyi afa labari aba ama ya fa kɔ kabo am yarada, ni am koro n ti barasu. Wo se ya ka am la sunsunni kpa fa ma ya sanɔa kere, na am koro ka am ηu ya kabo ya gusu koro ka ya ηu am ni. ⁷ Nyini ti, ya ninbaam, haari ni bo ya wo kekereke nu na ya sudi wahara n kere ni, am yarada n ama ya ahoresi. ⁸ Na nzen am jinaari kun su, fa kɔ Mibie n dee atin n su, ya koro da na ya daafi. ⁹ Kisa ya si má kabo ya da Nyeme asi fa ma am mmɔɔ, fa kɔ ahorejo bambaka n bo wo fa ama ya, am dee ti. ¹⁰ Kɔηgue ni wiesu kere ya sereeri Nyeme nahore su wo, ka, i ma ya ba ηu ya ηu, na ya kere am dekem bo i kpie am su fa kɔ am yarada n su.

¹¹ Ya sere ya Si Nyeme, ni ya Mibie Yesu ka bu teke atin ma ya, na ya koro ba am do. ¹² Na ya sere Mibie ni, ka, i ma am la koro buka su, na am fa koro am beηgu ni minem kere kɔ sin su, kabo ya gusu koro am ni. ¹³ Na i ma am nya ahoresi, na am jina kenken, na am ba yo mine casim bo be koro jarakɔ má am, ya Si Nyeme do, sanɔa bo

ya Mibiε Yesu bá baari ni i tienḡu minem kere ni.

4

Kabo ya wo wo bo i sun Nyeme nu barasu ni

¹ Ya ninbaam, ya yo kereeri am kabo i ti ye ni ka am wo barasu na i yo Nyeme fiε. Ya si ka am wo nyini wo n wɔ nahɔre su. Ama, ya sere am jande wɔ, ya Mibiε Yesu duma n nu, ka, am wo wo bo i kɔ tara sɔ. ² Dama am si nɔaniε n bo ya Mibiε Yesu fa maari ya na ya gusu fa maari am ni. ³ Nyeme koro ka am wo wo casi wɔ, na má be yo sakaraya. ⁴ I ti ye ni ka biesɔ kere ni i yi tara bu ḡu, na bu wo wo bo i ti casi na i la kansi. ⁵ Má am ma am konviki wo sakaraya sereya nu kabo minem bo bu su má Nyeme n yo ni. ⁶ Kabo i nya ti sɔ ni, má Kristo susufɔ be se ka i bu i niwa Kristo susufɔ ḡgbεen fa kɔ nyini sam su. Ya yo seeri am wɔ ni nahɔre kekereke, ka, sɔnɔ kere bo i yoori sɔ, Mibiε ni cín i mi sui. ⁷ Nyeme fereeri ya ka ya wo wo bo i ti casi wɔ, i koro má ka ya fa ya ḡu wura sakaraya sereya n nu. ⁸ Nyini ti, sɔnɔ kere bo i keteeri ahin kereewa ni, i ti má ka i sukete adamande wɔ, ama, i sukete Nyeme wɔ, yiri ma am i Awiewie Casi n a.

⁹ Tɔ, fa kɔ kabo am koro am ninbaam ni, ya la má jɔre be bo i ti ye ni ka ya kere ma am, dama Nyeme akere amberε ni am tii kabo am koro am beḡu barasu. ¹⁰ I ti nahɔre wɔ, ka, am koro ya ninbaam kere bo bu wo Makedoniya awɔre n nu ni. Haari ni nyini mmɔɔ, ya susere am wɔ, am koro bu koro bo i kɔ tara sɔ. ¹¹ Am yo anie na am

wo benle, na am nie am tienngu juma bo am yo i, na am fien anjuye na am di, kabo ya du mo seeri am ni. ¹² Nzen am yoori so, nyini ma minem bo bu nya yo ma Yesu yarada n bu am a, na am nie ma be anyumbaa fa ko am sa koroowa su.

Kabo Mibie ni ba kpie i nyi ba n jore

¹³ To, ya ninbaam, ya koro ka am si deke bo i ti nahore fa ko minem bo ba wu n do, adena ma am ahore saaki ka minem bo bu la ma tama be ni. ¹⁴ Ya yo yarada ka Yesu wuuri wo na wo tenge bekun, nyini ti, ya kaaki la yarada ka Nyeme tenge minem bo bu yoori Yesu yarada na ba wu ni, na i ma bu su Yesu su ba. ¹⁵ Kereewa bo ya sufa kere am kisa n fite Mibie n do o, ka, yere bo ya toko la ngoo ni, ceen n bo Mibie n ba baari ni, yere, ya du ma bere n bo ba wu n mo. ¹⁶ Dama Mibie n ni i tii ba fite angoro n nu jura na i ma noo, na Nyeme mereke kpian n tien, na bu kan Nyeme awie ni. Na minem bo bu yoori Yesu yarada na ba wu n du mo tenge bu yiwee n nu. ¹⁷ Nyini sanja, na Nyeme fa bere, ni yere bo ya toko la ngoo ni, na ya kpa Mibie n atin angoro yinyingu n nu. Na ya ko wo Mibie n do sanja kere. ¹⁸ Nyini ti, am fa ahin noaniem fa si am bengum ahore.

5

¹ Ya ninbaam, fa ko sanja n bo Mibie ni ba ba ni, ya la ma jore be bo i ti ye ni ka ya kere ma am fa ko nyini sanja n su kun. ² Dama ambere mmoo ni am tii si tenle su ka ceen n bo Mibie ni ba kaaki ba ni, i yo kabo awiefu ba kongue

ba wo n wo. ³ Saŋga bo minem ba suse ka tana-laifie ni ahoreda wo bere ni, nyini saŋga n nu ye kekereke kába ba tu bu a, kabo bara ba kuƙu ka i wu baa na i ti barasu ni. Nyini kekereke ni, soŋo be kóro fite má nu. ⁴ Ama, amberε, ya ninbaam ni, am wo má awosin nu bo Mibiε n ba ceen ni bá fura am nu, kabo awiefɔ ba fura soŋo nu na i wo n wo. ⁵ Amberε kere ti minem bo am wo wein n nu wo, kabo wiesu ti ni. Ya wo má koŋgue nu, wara awosin nu. ⁶ Nyini ti, má am ma ya daafi kabo nyingam daafi ni, am ma ya nyunu wo su na ya tara ya ŋu. ⁷ Koŋgue ye minem daafi a, koŋgue gusu ye minem nu nzan bo a. ⁸ Ama, yere wo wein nu wo, nyini ti, am ma ya tara ya ŋu, na ya fa yarada ni koro fa kanda ya ŋu ka bulaari peperepe bo ya fa kanda ya hoe su, na ya fa ahoresi ka ya nya tiide yo ka bulaari kere bo ya fa butu kanda ya tii. ⁹ Dama Nyeme ayi má ya ka i fá yaa na i cin ya sui wo, ama, i yiiri ya ka ya nyá tiide, ya Mibiε Yesu Kristo deε ti wo. ¹⁰ I wuuri yere deε ti wo, na saŋga bo i bá ba ni, nzen ya la ŋɔɔ o, wara nzen ya wu wo o, ya ni yiri saŋga wo a. ¹¹ Nyini ti, am ma am benngu ahoresi, na am buka am benngu na am ko mo ni am nyemesu ni, kabo kisa na am suyo ni.

Fotu jɔre

¹² Ya ninbaam, ya sere am wo, ka, am bu mo-fom ni, bere bo bu yo Nyeme juma ni anyumboro ma am ni, na bu nie am su, na bu kere am Nyeme atin ni. ¹³ Am ma bu jirima nahore su, ni koro, fa ko bu juma n bo bu yo i n deε ti. Am ma tanalaifie wo am ni am benngum do.

¹⁴ Ya ninbaam, ya kaaki sere am wɔ, ka, am bɔbɔ nviɛyafom ni, na am ma serefom n ahoresi, na am buka daburukafom ni, na am fa sawore ni sonɔ kere. ¹⁵ Má be se ka i fa i bengum satie bo i yo i fa tɔ i mi kaari, ama, sanɔa kere am ma am sunsunni la ka, am yo sakpa ma am bengum ni sonɔ kere.

¹⁶ Am ma am ahore jɔ, sanɔa kere, ¹⁷ na má am se ka am yaki am nyemesere, ¹⁸ na am da Nyeme asi, haari fa kɔ sa kere bo i tu am. Kabo Nyeme koro ka am yo lee, dama am ni Yesu Kristo ayo kun n ti. ¹⁹ Má am kanda Awiewie Casi ni, am ma i yo i juma. ²⁰ Nɔaniɛ bo minem deerɛ i Awiewie Casi n dɔ kan kereeri am ni, má am bu i ngbɛɛn, ²¹ ama, am fiiti i kere nu na am nie, na am de bo i ti kpa ni, na am su i su, ²² na am kete sa ngbɛɛnngbɛɛn kere pepere.

Awieeri su dɛɛ anse yoowa

²³ Ya sere Nyeme, yiri n bo i ma ahoreda n ka, i nmisi am ahorembaa, ni am njunie, ni am sunsunni kere casi, adena am wo wo bo fin be mata má am, haari fa kɔ ju sanɔa bo ya Mibie Yesu Kristo bá kpie i nyi ba ni. ²⁴ Yiri bo wɔ fere am ni, yiri la dabuɔ, i yó nyini sam n kere.

²⁵ Ya ninbaam, am sere Nyeme ma ya gusu, ²⁶ na am bisa ya ninbaam kere donɔgu ni koro. ²⁷ M susere am wɔ, am nie Mibie n ti, na am kan ahin kadasi n kere ya ninbaa yaradayofom n kere na bu ti.

²⁸ Ya Mibie Yesu Kristo buka am.

ΝΥΣΜΕ ΙΟΥΕ ΚΑΔΑΣΙ
The New Testament in Anufo (Chokosi)

copyright © 2009 Wycliffe Bible Translators, Inc.

Language: Anufo

Contributor: Wycliffe Bible Translators, Inc.

All rights reserved.

2020-11-13

PDF generated using Haiola and XeLaTeX on 21 Feb 2024 from source
files dated 29 Jan 2022

fe36d0e6-2a60-5e15-8d1c-8bf275389598